

26 NOV 1997

Mahathir-Apec

PEMIMPIN APEC MAHU TAMATKAN SEGERA KRISIS KEWANGAN

Oleh: Salmy Hashim

VANCOUVER, 26 Nov (Bernama) -- Para pemimpin Asia Pasifik pada hari Selasa bersetuju untuk mengambil langkah segera bagi menamatkan krisis kewangan yang mencengkam ekonomi-ekonomi Asia ketika ini dan memberi perhatian terhadap cadangan Malaysia mengenai kawal selia dagangan mata wang.

Perdana Menteri Datuk Seri Dr Mahathir Mohamad dalam sidang media di sini berkata: "Kami berpuas hati kerana diberi peluang untuk membincangkan mengenai krisis itu...para pemimpin Apec memberi perhatian serius kepada kami."

Dr Mahathir memberitahu wartawan Malaysia setamatnya sidang kemuncak Kerjasama Ekonomi Asia Pasifik (Apec) di sini bahawa beliau diberi masa yang secukupnya untuk melahirkan pandangan Malaysia mengenai kejatuhan nilai mata wang, dan hampir semua pemimpin Asean bersetuju dengan pendirian Malaysia.

Para pemimpin terbabit juga bersetuju dengan usaha Tabung Kewangan Antarabangsa (IMF) untuk mengkaji masalah yang menjejaskan ekonomi negara-negara membangun akibat serangan spekulator mata wang, kata beliau.

Para pemimpin daripada 18 negara Asia Pasifik telah membincangkan dengan panjang lebar mengenai perkembangan kewangan di rantau berkenaan dan bersetuju bahawa "cabaran baru" dalam sistem kewangan antarabangsa itu memerlukan "tindak balas baru"

Dalam apa yang dilihat sebagai satu kemenangan kepada pihak Malaysia, ketua-ketua kerajaan yang menghadiri sidang kemuncak itu mengakui betapa seriusnya krisis tersebut dan perlunya diadakan satu kajian oleh IMF sama ada sebarang kawal selia diperlukan dalam dagangan mata wang.

Walaupun tiada kaedah khas diperkenalkan oleh ketua-ketua kerajaan terbabit, pengakuan oleh ekonomi-ekonomi Apec itu akan memberi tekanan kepada IMF untuk menyiapkan kajian itu dan mengadakan satu pelan bertindak bagi menstabilkan pasaran kewangan, kata seorang anggota delegasi Apec.

Tambahan lagi, deklarasi 21 perkara yang dirumuskan pada sidang kemuncak selama dua hari itu, ada menyebut mengenai satu kajian oleh IMF terhadap peranan "peserta-peserta pasaran" dalam krisis kewangan yang melanda beberapa negara Asia.

Walaupun terdapat tentangan terhadap sebarang sebutan peniaga-peniaga mata wang atau dagangan mata wang dalam deklarasi itu, tetapi perkataan "peserta pasaran" adalah kiasan kepada "peniaga mata wang", kata seorang anggota delegasi.

Dr Mahathir berulang kali menggesa agar diadakan kawal selia terhadap peniaga mata wang yang dikatakannya sebagai bertanggungjawab terhadap krisis mata wang dan pasaran saham yang berlaku di rantau Asia.

Para pemimpin tersebut menghabiskan sepanjang pagi dan sebahagian sesi tengah hari berbincang mengenai krisis kewangan tetapi tidak memasukkan perbincangan mengenai prasarana. Bagaimanapun mereka ada membincangkan persidangan dunia mengenai perubahan iklim yang akan diadakan di Kyoto tidak lama lagi. Pada sesi petang pula, mereka membincangkan kemasukan tiga anggota baru

-- Peru, Vietnam dan Russia -- bermula tahun depan.

Mereka bersetuju sepatutnya terdapat moratorium 10 tahun ke atas keanggotaan susulan sidang kemuncak pemimpin Apec seterusnya di Malaysia pada 1998. Bagaimanapun, mereka tidak menyentuh mengenai keanggotaan dalam deklarasi 21 perkara itu.

Sidang kemuncak kelima itu diadakan di Universiti British Columbia (UBC) yang berusia 81 tahun.

Mereka juga menyokong penuh rangka kerja Manila yang direka bentuk untuk menggalakkan kestabilan kewangan dengan IMF memainkan peranan pusat.

Rangka kerja Manila menggesa diadakan kemudahan kewangan seragam bagi melengkapi IMF apabila perlu, dan bagi pengawasan rapi yang lebih rapat untuk mencegah sebarang masalah yang bakal timbul pada masa hadapan.

Korea Selatan, Indonesia dan Thailand tahun ini telah meminta bantuan kewangan daripada IMF.

Perdana Menteri Kanada Jean Chretien, ketika membacakan deklarasi itu berkata pemimpin Apec tidak akan patah semangat oleh pergolakan kewangan yang berlaku ketika ini dan sebaliknya akan meneruskan usaha pengliberalan.

Para pemimpin Asia Pasifik itu juga bersetuju untuk bekerja secara bersungguh-sungguh untuk mencapai rumusan dengan jayanya rundingan-rundingan Pertubuhan Perdagangan Dunia (WTO) mengenai perkhidmatan kewangan menjelang 12 Dis 1997.

Selain daripada perbincangan utama itu, pemimpin Apec juga mengiktiraf betapa pentingnya mempercepatkan tindakan menangani masalah pencemaran alam sekitar dan menegaskan semua anggota Apec boleh memberi sumbangan penting kepada usaha-usaha itu.

Rangka kerja Vancouver bagi meningkatkan perkongsian swasta-awam dalam pembangunan prasarana juga dimasukkan dalam deklarasi itu.

Rangka kerja itu menggesa agar perkongsian sektor swasta-kerajaan menguruskan prasarana yang diperlukan oleh rantau Asia Pasifik bagi memenuhi matlamat sosial dan alam sekitarnya. -- BERNAMA

SH MA NMO